

Λ 2017

52 70к

Б.Д. КЕРІМБЕКОВА



ФАРИЗА ОНФАРСЫНОВА  
ПОЭМАЛАРЫНДАҒЫ ИДЕЯЛЫҚ—  
КӨРКЕМДІК ІЗДЕҢІСТЕР



**Б.Д. КЕРІМБЕКОВА**

**ФАРИЗА ОҢҒАРСЫНОВА  
ПОЭМАЛАРЫНДАҒЫ ИДЕЯЛЫҚ-  
КӨРКЕМДІК ІЗДЕНИСТЕР**

*Монография*

«Елтаным баспасы»  
Алматы  
2017

ӘОЖ

КБЖ 83.3(5қаз)

К 32

Баспаға Сулейман Демирель атындағы университеттің

Ғылыми Кеңесі ұсынған

(Хаттама № 9, 27. 04. 2017 ж.)

**Пікір жазғандар:**

Филологияғының докторы, профессор **Д. Ысқакұлы**

Филологияғының кандидаты, доцент **C. Дәрібайұлы**

**Керімбекова Б.Д.**

**K32 Фариза Оңгарсынова поэмаларындағы идеялық-коркемдік ізденістер: монография / Б.Д. Керімбекова.** – Алматы: «Елтаным баспасы», 2017. – 192 бет.

ISBN 978-601-7537-60-9

Монографияда Ф.Оңгарсынова поэмаларының жанрлық-коркемдік ерекшеліктері бүгінгі күн түрғысынан жаңаша бағамдалады. Ақынның қазак әйелінің ұлттық болмысын танытудағы дербес ізденістері мен поэтикалық шеберлік мәселелері накты мысалдар арқылы талдап көрсетіледі. Фариза поэмаларындағы ұлттық сипат, мінез дараптығы, лиризм, психологизм, мотив мәселелеріне де назар аударылады.

Аталған еңбек жоғары оку орындары филология факультеттерінің студенттері мен магистранттарына, сондай-ақ, жалпы әдебиетші қауымға арналады.

ӘОЖ 821.512.122.0 (035.3)

КБЖ 83.3(5қаз)

ISBN 978-601-7537-60-9

© Керімбекова Б.Д., 2017

## КІРІСПЕ

Қазақ әдебиеті тарихында дара қолтаңбасымен ерекшеленетін Қазақстанның Халық жазушысы, көрнекті ақын Ф. Онғарсынова поэзиясы хақында әдебиеттанушы-ғалымдардың өзіндік ғылыми талдау-тұжырымдары, бағам-байлаулары бар. «Ф. Онғарсынова поэзиясының табиғатын тану – алыштардан бастау алады». Көрнекті сөз зергерлері F. Мұсірепов («Екі ауыз сөз»), Ә. Тәжібаев («Ой мен сезім нақыштары») айтқан бағалы ойлармен қоса М. Қаратеев, Ә. Шәріпов, С. Сейітов, З. Ахметов, З. Қабдолов, Ә. Жәмішев, С. Қирабаев, Т. Тоқбергенов, Р. Нұрғали, т.б. сынды ғалымдар да өз еңбектерінде Ф. Онғарсынова поэзиясына аса үлкен ықылас танытқан болатын. Ақынның өз замандас-қаламдастарынан, жолын қуған іні-сіңлілерінен Б. Асылжанов («Менде бір тебіреніс бар»), К. Ахметова («Ақынсыз бір сәті, бір күні аныз»), С. Жұмабеков («Жырлары жанарында жарқылдаған»), Н. Оразалин («Асқақтық пен Рухты аялаған жыр»), Ә. Кекілбаев («Нұрлы жүрек туғызған Жыр-күдірет»), У. Қалижанов («Уақыт үндестігі»), Ә. Бепежанова («Өжет жырға өлім жоқ»), Т. Медетбек («Қасіреттен тұрады бакыттым да») оның өлеңдеріне тоқталмағандары, жоғары бағаламағандары кемде-кем. Мұндай әдеби-сын мақалалар, зерттеу еңбектер ақын шығармашылығының зерттелу аясын көңейте түсті. «Жыр жазу деген – азап, от, Әйел боп туған болмысқа», – деп бар өмірін өленге сыйғызған Ф. Онғарсынова поэзиясының қазақ поэзиясынан ойып орын алуы да заңдылық.

Алайда, Ф. Онғарсынова мұрасында әлі де жүйелі арнада зерттелмеген, ғылыми тұжырымға енбеген саланың бірі –

ақынның поэмалары. Поэма – жалпы әдеби процестегі көрнекті қызмет атқарып келе жаткан құрделі жанрдың бірі. Ұлттық, жанрлық, стильдік, көркемдік ерекшелігі мол, үздіксіз дамып отырган қазақ әдебиетінің үлкен саласында Ф. Онғарсынова оқырман жүргегіне жол тапқан өлеңдерінен тыс әртүрлі тақырыпта, әртүрлі жанрда оннан астам поэмалар жазды. «Сайраган Жетісудың бұлбұлымын», «Тартады бозбаланы магнитім», «Тыңдандар, тірі адамдар», «Қасірет пен ерлік жыры», «Сырласу немесе ақын әйелдің анасымен диалогы», «Дала тағдыры», «Мүшәйра», «Қырдағы айқас», «Мен өмірді сен деуші ем», «Алмас қылыш немесе мен Махамбетпен қалай кездестім», «Ақбөбек жырлары», «Қарғыс», «Дыбыстар әлемі», «Қазақтың бір қызы бар Кәмшат деген» сынды поэмалары оның ақындық диапазонының кең және терен екендігін дәлелдеді. Ф. Онғарсынова поэмалары уақыт пен заман сырын, оның тарихи-әлеуметтік мәнін көркем бейнелеуде, шындықтың қоғамдық-философиялық сипатын анықта көрнекті қызмет атқарады.

## **1 Ф. ОҢҒАРСЫНОВА ПОЭМАЛАРЫНЫң ТАРИХИ, СЮЖЕТТИК НЕГІЗДЕРІ**

Ф. Онғарсынова поэмаларының басым көпшілігі тарихи тұлғаларды арқау еткен. Сол арқылы ақын тарих пен бүгінгі күннің өзара сабактастығын тауып, тарихи дәуірдің шындығын көрсетуді мақсат тұтады. Сондай-ақ, ақын өлең сөзбен тарихқа айналған тұлғалардың рухани портретін сомдайды. Осы тұста «тарихи тұлға» дегеніміз кім? деген заңды сұрақтың туары анық. «Қазақ әдебиетіндегі тарихи тұлға проблемасы» атты монографиясында Ә. Тарақ осы мәселені жан-жақты қарастыра келе, В.Г. Белинскийдің мынадай анықтамасын ұсынады: «Тарихи тұлға бұл қашанды белгілі бір дәуірдің құбылысы, бірак оны әрбір жазушы өзінің уақыты және дербес психологиясы түрғысындағы көзқарас бойынша қарастырады» [1, 274 б.]. Ал ғалым Қ. Әбдезұлы «Тарих және тағдыр» атты зерттеу еңбегінде: «Ең алдымен, тұлға деген үғым – тарихи өлшем. Яғни, тарихи түрғыдан ел үшін, халық үшін орасан маңызы зор, тарихи мәні терең іс-әрекеттерге барған, немесе аса жауапты тарихи сәттерде халық тағдырында айрықша орны болған адамға халықтың өзі осындай тұлғалық деңгейге көтеретін бағаны беріп отырган» [2, 158 б.], – дейді. Демек, тарихи тұлғаға арнап шығарма жазу – ақынның биік интеллектін, терең танымы мен биік парасатын байқататын күрделі процесс.

Қазақ поэмаларының өткенине көз жүгіртсек, поэмадағы тарихи тақырып отызыншы жылдардан бастап идеялық шеңберлік түрғысынан кемелдене түсті. Тарихта болған өнер қайраткерлері, дарын иелері туралы поэма жазуда ақындардың арқа сүйегені – И. Жансүгіровтің ақындық дәстүрі болғаны белгілі. И. Жансүгіров «Күй», «Күйші», «Құлагер» поэмалары арқылы өнер адамын бейнелеудің поэмадағы жарқын үлгісін қалыптастыруды дейміз. Ал «осы дәстүр жалғастығының мысалы ретінде Ә. Тәжібаевтің «Ақын», «Күй атасы», «Майра»,

«Оркестр», Қ. Бекхожиннің «Аппақ–наме», «Күрманғазы», «Мәриям Жагорқызы», Ж. Молдағалиевтің «Кісен ашқан», М. Әлімбаевтың «Естай–Қорлан», Т. Бердияровтың «Біржан сал», «С. Иманасовтың «Айтыс», С. Сейітхазиннің «Балуан шолақ», Ө. Күмісбаевтің «Махамбет» поэмаларын атауға боллады» [3, 32 б.]. Аталған поэмалардың басым көшілігі тарихта болған өнер адамының өнер жолын бедерлеуге бағытталды. Алайда, тарихи тақырып – бір кезеңнің әдебиетімен ғана шектеліп қалатын тақырып емес. Бұдан кейінгі кезеңде де бұл тақырыпка поэмалар жазуды ақындар токтатқан жок.

1960-80-жылдардағы қазақ прозасында да тарихи тұлға бейнесін қоғамдық шындықпен сабактастыра суреттейтін көркем шығармалар аз жазылмады. Тарихи тұлға өмірінің белгілі бір кезеңдерін суреттеу, шығармаларына тарихилық сипат дарыту осы жылдардағы әдебиеттің қай жанрында болса да белсенді түрде көріне бастады.

Ф. Оңғарсынованың халық үшін күрескен тұлғаларға арналған жазылған тарихи тақырыптағы поэмалары өзінің композициялық жүйесінің мықтылығы, сюжеттік желісінің қызықтылығымен, образ жасау шеберлігімен қазақ поэмаларын дамытудағы мәнді туындылар ретінде бағаланады. Яғни, ақын дәстүрлі эпикалық шығармаларды жаңа сапаға сай жаңғырта отырып, әртүрлі тақырыпты қамтитын поэмалар туғызды. Ф. Оңғарсынованың тарихи тұлғаны арқау еткен кең көлемді шығармаларының қатарында Жетісудың бұл-бұлы атанған Сара ақынға арнаған «Сайраған Жетісудың бұлбұлымын», қазақ қыздарының арасынан шыққан тұнғыш кәсіби әнші Майра Уәлиқызына арнаған «Тартады бозбаланы магнитім», атакты Ақан сері Қорамсаұлына арнаған «Ақан сері аңыздары», поэзия алдаспаны Махамбетке арнаған «Алмас қылыш немесе мен Махамбет ақынмен қалай кездестім», Шығыстың қос жұлдызы атанған Элия мен Мәншүкке арнаған «Тыңдаңдар, тірі адамдар», композитор Г. Жұбановаға арнаған «Дыбыстар әлемі», қазақ қыздары-

ның ішінде алғашқы болып «темір тұлпарды» бағындырган Еңбек ері К. Дөнентаеваға арнаған «Қазақтың бір қызы бар Қемшат деген» атты поэмаларының қазак поэзиясынан алар орны өзгеше. Сондай-ақ, Ф. Онғарсынованың «Күй» атты күйші Динаға арнаған диптих, ақын М. Хакімжанова жайлы «Жыр анасы» атты триптихін, ақын М. Мақатаевқа арнаған «Мақатаев туралы жыр»циклдық топтамасын, Халық артисі, күміс көмей әнші Б. Төлегеноваға арнаған «Бибігүл-ән» арнауын даралап айтудымыз кажет. Тарихи тұлғалар өмірін өз поэмаларына негіз етіп алғанда, Ф. Онғарсынова өзінен бұрын салынған дәстүрді негізге ала отырып, осы тақырыпты өзіндік жаңалық, ерекшелігімен байытты, өзіндік дара қолтаңбасын да байқата білді.

Ф. Онғарсынова поэмаларына тән жанрлық-турлік ерекшеліктер турасында әдебиеттанушы Р. Аябергенұлы: «Ф. Онғарсынова поэмаларындағы ең негізгі ерекшелік – лиризмнің үстемдігі. Мысалы, «Мен өмірді сен деуші ем», деген поэмасы бозбаланың күнделігі түрінде жазылған таза лирикалық поэма. Ал «Сайраған Жетісудың бұлбұлымын», «Тыңдандар, тірі адамдар!», «Алмас қылыш немесе мен Махамбетпен қалай кездестім?», «Ақбебек жырлары» поэмалары тарихи-лирикалық поэмалар. «Дыбыстар әлемі» – лирикалық поэма, ал «Мұшәйра» – лиро-драмалық поэма деп білеміз» [4, 31 б.], – дейді. Дегенмен, Фариза Онғарсынова поэмаларын жоғарыдағыдай қандай да бір шартты топтастырудың ақын поэмаларының зерттелу аясы үшін аздық етері анық.

Ф. Онғарсынованың «Сайраған Жетісудың бұлбұлымын», «Тартады бозбаланы магнитім», «Ақан сері аныздары», «Дыбыстар әлемі» поэмаларын, күйші Динаға арнаған «Күй», әнші Б. Төлегеноваға арнаған «Бибігүл-ән» атты циклдық жырларын өнер адамының өзгеше тағдырына арналған шығармалар қатарына қосуымызға болады. Аталған поэмалардағы негізгі мәселе бір адамның тағдыры емес, еркіндікті, азаттықты аңсаған шығармашылық адамына ортақ тағдыр. Мұндағы

Майра, Сара, Ақандар солардың жиынтық образы. Ф. Онгарсынова шығармашылығын осы негізде бағдарлап, ой елеғінен өткізетін болсақ, ақынның өнер адамының тарихи тұлғасын жасауда поэма жанрында жаңа стильдік іздептерге барғандығын байқаймыз. Ақынның тарихи тұлғалар хакындағы поэмалары мен жыр-циклдары дәл бүгінгі күн тынысымен аса үндес. Бұл поэмаларда ақын өнерпаз тұлғалардың өмір жолын әлеуметтік ортаның ахуалымен тығыз байланыста бейнелейді. Осылайша қылыштар арасындағы тартыс әрекетті суреттей отырып, тарихта белгілі адамдардың, өнерпаз тұлғалардың характерін ашып, образ жасауға тырысады.

Әдебиет атты әлемде әрбір суреткердің қызыға, қызықтыра жырлайтын өзіне етене жақын тақырыбы болатыны белгілі. Сол арқылы оның авторлық идеясы, дербес көзқарасы аңгарылып жатады. Ф. Онгарсынованың шығармашылығындағы басты тақырыптардың бірі – әйел тағдыры, әйел жолы. Әйел тәқаппарлығының, әйел жанының азаттығын өз халқының өткен тарихынан іздестіру – Фариза поэзиясының өзгешеліктерінің бірі. Ақын шығармашылығына тән осы ерекшелікті анық байқаған З. Мутинев: «Ф. Онгарсынова лирикасындағы өзгешелік сол – ондағы әйелдер образы типтік дәрежеге дейін көтерілген бейне саналады. ...Суреткердің қаламынан туған әйел тағдыры, оның өмір түйткілдерінен сыр тартқан сан қылыш поэтикалық дүниелердің ауқымы да комакты» [5, 11 б.], – дейді. Қазак әйелінің қайсар мінезі, олардың бір-біріне ұқсамайтын өзіндік болмыс-бітімі ақын шығармашылығында да бөлекше сипат табады.

«...Шынымды айтсам, мен жалпы әйел тағдырының жүгі көбірек, қыннырақ дер едім. Ал нағыз өнердің шытырман жасы, тіпті суреткерлік табиғаты әйелге бұйырса, ол екі есе киын. Тағдыры өнермен байланысты әйелдер жайлы ойланатынды да осыдан болар. Қазак әйелінің бойындағы адам таңғаларлық ғажайып қасиеттер кім-кімді де табындырады

деп ойлаймын. Ал, заманның қаталдығына, қыз жолының жіңішкелігіне қарамастан, қазак қызының қабілетін, өнерін халықта таныта білген Сара, Майра, Диналарға гимн жазса да артық болмас еді» [6, 189 б.], – деген Фариза қазактың біртуар талантты да қайраткер қыздарына арнап бірнеше поэмалар жазды. Соның бірі – атакты «Жетісудың бұлбұлы» – Сара Тастанбекқызының өмір тарихын, өнер жолын арқау еткен «Сайраған Жетісудың бұлбұлымын» поэмасы.

Поэма ерекшеліктеріне тоқталmas бұрын, Ф. Онғарсынова неге Сара, Майра, Ақан, т.б. сынды өнер иелерін поэзиясына арқау етеді, бұл тақырыпка баруының себебі неде деген сұраптарға жауап беріп көрелік. Ең алдымен, жастайынан ауыз әдебиетінің маржанынан қанып ішкен ақын содан алған әсерін, көріп-біліп, көкіргіне түйгендерін өз шығармашылығына орнымен пайдалана білген. «...Менің ерекше сүйіп оқитыным «Біржан мен Сара қыздың айттысы» еді. ...Әйел заты ер-азаматқа тұра қараң тұрып өзінің ойпікірін, мүмкіндігін ашық айтудына болады екен-ау, деген ой – ұшығын кеудеме түсірген де Сара апамыздың осы айттысы» – деген еді Ф. Онғарсынова бұл жөнінде «Сұқбаттар» атты естелігінде [6, 160 б.]. Осы сездін шындығын ақын «Сайраған Жетісудың бұлбұлымын» поэмасында:

Арман-жолда шың-құздар өріндегі,

Адастырмай албырттау көніл мені.

Жалқы темірқазығым – Махамбет те,

Жыр – Шолпаным өзіңсің көгімдегі [7, 7 б.], –

деп жырмен ажарлай түседі. «...Жаратылыс берген сәуленің үлкен алауга айналуы үшін алдыңда теңіздегі маяктай алыстан болса да жарқыраған бір үлгілер болуы қажет-ак. Өнердегі ұстаздық деген сол. Мен үшін Сара апамыз сондай шамшырақ болған еді. Менің рухани ұстазым – Сара. Бұл шығармаларды анам да ұннататын, мен қанша оқысам да, анам жалықпай, сүйсіне тыңдайтын» [6, 329 б.], – дейді ақын. Ақынның анасы Халима да көп сөйлемейтін, аса ақылды,

рухани қуатты, ылғи мақалдан сөйлейтін, ән-жырға жақын жан болған екен. Осыдан болса керек, болашақ ақын өнерге бала кезінен ынтық болып өседі, өзінің айтуынша домбыра, кобыз, сырнай сияқты аспаптарда еркін ойнайтын. Ақынның ән-күйге деген осы сүйіспеншілігі, оны терең түсіне білетіндігі «Дыбыстар әлемі» поэмасынан анық байқалады. Яғни, ақынның бұл тақырыпқа келуі кездейсоқтық емес. Өнерге деген құштарлық ақын бойына ана сүтімен дарыған талант болса керек. Талант – курделі құбылыш. Орыс әдебиетінің теориясын зерттеуші Н.А. Гуляев талант жөнінде: «Это – комплекс творческих сил и способностей человека, обеспечивающих прежде всего эстетическую сторону писательского труда, образную, эмоционально-выразительную специфику художественного произведения», – дейді [8, 106 б.]. Ал қазактың өз ұғымында, талант – ана сүтімен бойға даритын түа біткен қасиет. Ақындық та солай. Ақынның өмір жасы оның өлеңдері өмірімен өлшенбек. Оқырман жүргегінен алған орнына қарай біреулері сан ғасырлар өмір сүрсе, кейбір еуролері уақыт төрешінің талғамынан шықпай шетте қалып кояды. Сирек кездесетін тагы бір талант иелері бар, олардың шығармашылық ғұмыры қашанға созылса да, олар мәңгі жас. Оқырманы да жас. Заман талабы өзгеруі мүмкін, бірақ оның өлеңдері бәрібір оқылады. Осындай өміршең туындылар арасында Ф. Онғарсынова шығармашылығы тұр. Халық жазушысы Ш. Мұртазаның сөзімен айтар болсақ: «Нағыз ақындар гауһар тас іспепті өте сирек. Жұз жылда бір келеді. Ендеше сол сиректің бірі және асылы Фариза» [9, 3 б.]. Демек, ақынның эстетикалық талғамының биiktігі, жан әлемінің нәзіктігі, рухани байлығы, осының барлығы ақынды өнер тақырыбына арналған шығармалар жазуына алып келеді.

Поэмаға негіз болған бас кейіпкер – Сара Тастанбекқызы тарихта болған, 1878-1916 жылдар аралығында өмір сүрген айтыскер ақын. Туган жері – Алматы облысының Қапал ауданы. Руы – Найман. Сара әкесінен ерте айырылады. Өзінің

қысқа ғұмырында тауқыметтің талайын қөріп, әлеуметтік теңсіздіктің тәлкегіне ұшыраған Сараның шығармашылық жолы тым ауыр да күрделі. Сараның өмір жолы, оның жеке өмірінің кейбір сәттері жөнінде «Сара Тастанбекқызының өміrbаяны мен творчествосы туралы деректер» деп атала-тын жогарғы оку орындары студенттеріне арналған шағын зерттеу еңбекте біршама маглұматтар беріледі. XIX ғасырда өмір сүрген қазақтың аяулы ақын қызы Сараны біреулер тарихи тұлға десе, екіншілері – Сара көркем бейне, жиынтық тұлға деседі. Дегенмен, Сараның өмірде нақты болғандығын дәлелдейтін жайт – оның өлеңдері. Осы текстес даулы сұрактар «Біржан-Сара» айтысының айналасында да өрбіді. «Біржан - Сара» айтысының өмірде нақты болғандығы, я болмағандығы турасында қазақтың академик – жазушысы С. Мұқанов бы-лай деп жазады: «Сараны Біржанның ізден баруы анық. Біржанның Нұржан деген ағасының баласы Ахметжанды мен қартайған шағында көрдім. Ахметжан: «Мен Біржанға атқосшы болып барып ем, Сараны көрдім, айтысқандары рас», – дейтін. Халық әдебиетін жинаушы, Біржан мен Сараның айтысын алғаш рет баспаға берген Жусіпбек Шайқұлислямов бұл айтысты Сараның аузынан жазып алдым дейді» [10, 29 б.]. Осы айтыстың төнірегіндегі таласқа үн қосқан F. Мұсірепов те өзінің «Ақын Сараға соктықласақ қайтер!» деген мақаласында: «Қазақтың әдебиет зерттеушілері мен ақын-жазушылары еш уақытта бұл айтыстың болғанына шек келтірген емес. Ғасырлар бойына жасап келген поэзиямыздың көрнекті бір саласы болып келген ақындар айтысының ең биігіне көтерілгені – «Біржан-Сара» айтысы деп білеміз. ...Оз басым ақындар арасында Сараның алатын орны бірінші қатарда деймін. Мәселен, қазақ әйелдерінің ішінде әншілік туын Майрага, күйшілік туын Динаға, опера өнерінің тұнғыш туын Күләшқа ұсынатынымыз сиякты, ақындар айтысының асқақ туын Сара Тастанбекқызының қолында көргім келеді» [11, 327 б.], – деп бұл мәселенің соңғы нүктесін қойған болатын.

Қазақ поэзиясында Ф. Онгарсынованың «Сайраған Жетісудың бұлбұлымын» поэмасынан бүрын да ақын Сараға арналған біршама шығармалар жазылған болатын. 1974 жылы 8-наурызда «Социалистік Қазакстан» газетінде М. Айтқожинаның «Ешкі өлмestегі ескерткіш» атты поэмасы жарияланады. Кейіннен М. Айтқожинаның осы поэмасы 1986 жылғы тандамалы өлеңдер мен поэмалар жинағына енген. Аталған поэмалы тек қана Сараға арналған поэма дей алмаймыз. Өйткені, ақын Сара ауылтына көз жібере отырып, оның бүгінгі күнгі қол жеткізген жетістіктерімен қатар, соған ұйытқы болған әкім-қаралардың елеулі еңбектерін жыр етеді. Ақын М. Айтқожина:

Ашы жаспен жудың-ау, ай жүзінді,  
Нәзік үнің айтшы, қайда  
Үзілді.  
Қарашы, апа,  
Бір көтеріп басынды,  
Қандай ғажап біздің өмір  
Бүгінгі [12, 397 б.], –

деп Сара рухымен ойша тілдесе отырып, бар айтарын ақын апасына сырғып ашады. Алайда, «Ешкі өлмestегі ескерткіш» поэмасындағы Сара бейнесі ашылмаған, алдыңғы орынға Сара образы емес, ақынның өз толғаныстары шығады. Осы орайда М. Айтқожина поэзиясы туралы пікір білдірген ғалым Т. Кекішевтің: «М. Айтқожина бірнеше поэма жазғанымен, лирикадан алыстап кетпейді екен. Оқушыны шытырман сюжеттеп емес, мәнді сыр, салмақты ойларымен тартып отырады. Оны көбінесе өлеңнің көлемінде шақтайтында сияқты» [13, 9 б.] – деген пікіріне жүгінеміз.

Ақын Сараға арналған С. Иманасовтың «Біржан-Сара» айтысының негізінде жазылған «Айтыс» поэмасы Сараның тарихи бейнесін жасауға ариалады. С. Иманасовтың «Айтыс» поэмасындағы басты оқиға Біржан мен Сараның айтысы төнірегіне құрылғанымен, екі ақынның айтыс үстіндегі іс-

әрекет, мінез, көңіл – күй ерекшеліктері поэмада терең ашылмайды. Поэма «Біржанның бірінші монологы», «Сараның бірінші монологы» сынды тарауларға бөлініп, негізгі ой Сара мен Біржанның өз монологтары арқылы беріледі. С. Иманасовтың «Айтыс» поэмасындағы Сара Ф. Онғарсынова поэмасындағыдан өр рухты, кесек мінезді Сара емес, сол кездегі көп кыздардай тағдырына қарсы тұrap шамасы жоқ, пешенесіне жазылғанға көндіккен Сара. Оны ақын С. Иманасов поэмасының соңына таман былай деп анық аңғартады:

Сол – ак па бұйырганы бақ талайға?  
Бұлқынып,  
Бұғау үзер таппады айла.  
Ақын боп ақырғы рет бір көрініп,  
Қатын боп қала берді Қаптағайда [14, 131 б.].

Сарага деген тарихи елеулі ескерткіштің тағы бірі – «Біржан-Сара» операсы болып саналады. Академик жазушы К. Жұмалиевтің либреттосы бойынша атақты композитор М. Төлебаев жазған бұл опера қазактың музика өнерінің төрінен орын алады.

Ал біз сөз етіп отырған Ф. Онғарсынова поэмасындағы Сара бейнесі мүлде бөлек көркемдік арнада ашылады. Ф. Онғарсынованың поэзиясындағы қазақ әйелдерінің суреттелуінің өзіндік ерекшелігі бар. Оның «әйелдері» әр дәуірдің, әр кезеңнің өкілдері болып келгенімен, олар іштей өзара бірбірімен біртұастық табады. Ол тұтастық – олардың мінездерінен байқалады.

Сараны өзінің өнердегі ұстазына айналдырған ақын «Бұралаң жол, бұрқасын өткелімен, Сендік тағдыр менің де тағдырымдай», – дей келе өткелі көп өлең өлкесінде өз өмірі мен кейіпкерінің өміріндегі ұқсастықты аңғартады. Шынында да, поэмадағы Сара ойларынан, Сара сөздерінен лирикалық қаһарманның тұлғасын көру киын емес. Яғни, ақындық «мен» Сара бейнесі арқылы көрініс табады. Осы орайда неміс философы Ф. Ницшенің: «Лириктің образдары

ақынның өзінен басқа ешкім де емес, бұл тек оның әрқишли формада объективтеген түрпаты» – деген пікірі ойға оралады. Сара қыздың тағдыры ақын үшін поэма арқауы ғана емес, лирикалық кейіпкер өмір сүрген қоғамды, ондагы адамдарды танытудың өзіндік тәсілі де.

Айттыссам ақ бұлактай актарылам,

Кешпеймін біреулердей жыр жылымын, –  
деп айбынды үн қатқан лирикалық қаһарман жырға, сөз өнеріне қатаң талап қояды.

Жыршы емес, елдің жүгін тарта алмаса,

Таңдайға алмас сөзді арқандаса.

Іштегі буырқанған жай тасқынын

Жасқанып, актара аламай жалтаңдаса –  
дейді. «Айтпаса, сөздің атасы өледі». Ақын болып тұрып халықтың жүргегіндегі сөзді жеткізе алмаса, жырына елдің мұнын ортақтастыра алмасаң, сенің ақынмын дегенің де құр бекершілік. Ақын «таңдайға алмас сөзді арқандатумен» осы айтпақ ойын көркемдеп, аз сөзге көп мағына дарыта түскен. Поэмалың басында ақын Сараның жыр туралы найзагай жарқылындағы өткір пікірлері айттылса, екінші, үшінші бөлімдерде Сара қыздың туған жер туралы толғаныстары сөз болады. «Жер жәннаты Жетісудың» сұлулығы Сара шабытына шок тастайды. «Жаңғыртып жоталарын, Шыркаймын құз басынан. Жаныма от аламын, Найзагай сырғасынан», – деп туған жерін жырға қосқан ақын қыздың қиялты алыстарды шарлайды.

Ф. Оңғарсынова поэзиясының ерекшеліктерін танытуға арналған «Менде бір тебіреніс бар» атты мақаласында Б. Асылжанов былай дейді: «Ақын жырында әйелдер бейнесінің көңіл–күйі әлем тапырақ сезім болып айтылады, тек жай ғана айттылу емес, қазіргі замана талабының биік өресінен лайықтап айту – Фариза туындыларының бір қыры» [15, 12 б.]. Шынында да, ақынның лирикалық кейіпкер – әйелдерін үнемі бір кейіпте көру мүмкін емес. Және олар өз басының

тыныштығын ғана ойлап, бір сарынды өмірді ұнататын, бейғам жандар емес. Қажет кезінде қолына кару да алатын, дауды шешер билік те айтатын өресі кең, өр мінез иелері. Осындай қасиеттердің кейбірін автор акын Сараның бойына да дарыта көрсетеді. Сараның сол ауылдың белді бір байының жылқысын үрлаған кедей жігітке байдың өзінен кешірім беруді сұрап, тұтқыннан босатуын өтінгені поэманиң төртінші бөлімінде сөз болады.

Байеке, жарагансыз нық тұғырдан,  
Ел билер ерлер ғана жұртты ұғынған.  
Ұрлаған бір жылқыны мен төлейін  
Жігітті босатыңыз тұтқыннынан [7, 10 б.].

Поэмада автор кейіпкер сөзіне аса мән берген. Автордың акын Сараның аузына салған осынау намысты, қайратты сөздері кез-келгенге жараса бермейтін, санаулы жандардың ғана еншісіне тән батыл ойдың жемісі. Кейіпкердің характерін ашу мақсатында топ алдындағы көлшілікке бағытталған сөздерін молынан пайдалану арқылы Сара образын айқындауга тырысады. Өз басының бостандығын қорғай алмаған Сара азаматтың ары тапталғанда жаны күйіп, араша тілейді. Бұл – ақын жырларына тән батылдық сипатының бір көрінісі. Қажет жерінде бұқпантайламай, бой көтеретін осы сипат ақынның барлық поэмаларына ортақ. Адамзат өмірінің мәңгілік емес тігін, тіршіліктің тұтқасы сыйластықта екендігін айткан асқақ үнді Сара акын бостандықты жыр етеді:

Ел бастап, ат мінгенмен кем күн бүтін,  
Жарытпас, сезе алмаган ел тірлігін.  
Бостандық – тұнғыш байлық бұл далада,  
Жігіттің қайтарыңыз еркіндігін [7, 10 б.].

«Біреу бай, біреу жалқы күн кешетін бұл заманда басты байлық-бостандық» деген ойды қуаттайды. «Бак деген, байлық деген жанға қонақ, Шыгады ажал бір күн алдан орап», – деп, халық аузындағы «Дүние ойлап тұрса шолақ екен, Адамдар бір-біріне қонақ екен», – деген өмірлік пәлсафанды

жанашылдықпен жалғастыра жырлайды. Поэмандың келесі бөлімінде Сара қыз өмір жайлары, оның сан алуан күбылыстары: алауыздық пен татулық, махаббат пен жауыздықты жырга косып, үлкен бір философиялық ой түйіндейді. Бұл бөлім тек құрылышы жағынан гана емес, мазмұны тұрғысынан да халыққа ақыл-өсіет, нақыл түрінде айтылатын толғау жанрына жақын, жыраулар поэзиясымен үндесіп отырады.

Кызы едім Тастанбектің, атым – Сара,

Дарамын туда біткен ақыл – сана,

Еркінмін, нәзік жанмын, тәқаппармын –

Осылай тәлім берген ақылшы ана, –

деген үзіндіден аңғарылатын еркелігімен катар ер мінезді Сара қыздың да еркіндігі ұзакқа бармайды. Өзі өмір сүріп отырған уақыттың басты трагедиясы – қалың малға ол да тап келеді. Өзінің ықтиярының күйеуге бермек болған ағаженгелеріне деген Сара қыздың наразылығы поэмандың алтыншы болімінде сөз болады. Тайғақ тағдырлы қазақ қызының басына қалың мал қамытының киілуімен, бәрін жазмышка сүйей салып, ең бастысы малды ауыл болса болды деген сол кездегі қарангырылдықты, надандықты ақын жыр-жебемен аяусыз жаншып отырады. Қазақ қызының басына уақыт салған салмаклен қоса «Байтал шауып бәйге алмас» деген шынжыр ұғымының аяқтан шалуы – міне, осылардың барлығы Сара образы арқылы ашылады.

«Не дейміз?» «Жазымыш қой!» Жыла, жаным!

Жаны – жат, керең кеуде – бұл адамың.

«Жақсы ауыл?» Ауыл жақсы қай кезде де,

Қажетсіз ақ ордалы құдаларың! [7, 14 б.]

Лирикалық кейіпкер сөзімен айтсақ, «жаны-жат, керең-кеуде» жандардың құрбаны болғыз Сара емес. Бұл сол кездегі қазақ қыздарының бәрінің басында бар жағдай. Бірақ, бір басынан еркіндік, те, нәзіктік те, тәқаппарлық та табылатын ақын қыздың көртартпа заманның құрбаны болмай, оған қарсы тұруы – поэмандың әлеуметтік салмағын

арттыра түскендей. «Фариза поэмасындағы әйелдердің стихиясы күреске толы. Жәй әйел емес, ел намысын ойлайтын азамат. Ән мен жырдың думаны, Сара өз бақыты үшін күресе біледі.

«Тандаймын қалауымды! Еркімді бер,

Табамын дала кезіп, құздарды аттап!»

деп эпостық шығармалардағы аруларға тән ірілік қорсетеді [16, 160 б.].

Сара ақынның бары да, бақыты да – өлеңдері. Уш жүзге даңқы жайылған ақын кәріге де жасқа да жырларымен жылышың таратты.

Келер жас ой теренниен шашса жақұт

Жоқ менде басқа тілек, басқа бақыт, –

деп келер үрпақтан жылымшы, жасық жыр емес, отты жыр күтеді. Ақын кейіпкері жастығына қарамай, парасатты терең ой айта біледі. Поэмадағы Сара қызы тек өнерімен ғана бағалы емес, оқырманына айналасында болып жатқан ірлі-ұсак қоғамдық маңызды істерге араласа білетін ақыл иесі ретінде де танылады. «Сайраған Жетісудың бұлбұлымын» поэмасы тек кана ақын қыздардың өмірін өрнектеумен ғана емес, замана сипатын дәл бере білуімен де күнды.

Тартқандай шатқалдармен құзға дара,

Жыр жолы оңай емес қыз балаға.

Тағдыры толқындағы тал қайыктай

Сен үрүп шырқ үйірген мұз жағада, –

деге келе ақын қызы бала үшін өнер жолының, әсіресе, ақындық тағдырдың әлеміне енудің қындығын тілге тиек ете келе, алайда, ақын үшін тіршілік рахатының маңызды емес, ол өлеңімен ғана бақытты деген үлкен ой тастайды.

«Сайраған Жетісудың бұлбұлымын» поэмасының сегізінші болімінде Сара қыздың адам, өмір, қоғам жайындағы толғаныстары ақындық тілмен былайша өріледі:

Өтеді уақыт, өтеді өмір демде...

Қабырғасы жылдардың сөгілгенде.

Мылқау мезгіл құяды мұзды суын  
Алаулаған сезімге, көңілдерге.

Өмірің де – шырқайтын бір жалқы ән,  
әуенінен өрт екпін, қарқын ұғам.  
Аққан жүлдyz секілді ғұмырың да,  
Мәңгі үшқындар қалсын тек жарқылынан! [7, 16 б.]

Бұл жолдардағы айтар ойымен ақын ешқандай да жаңалық ашып отырған жоқ. Өмірдің көзді ашып-жұмғанша-ақ өте шыгарын Фаризага дейін де нешеме ғұлама-акындар айтқан, әлі де айтып келеді. Бірақ мәселе кімнің қашан айтқанында емес, кімнің қалай айтқанында, қалай жеткізгендігінде. Бес күндік жалған дүниенің баянсызыдығын ақын «Жылдардың қабыргасының сөгілуімен», білдіртсе, қайғы-касіреттің айтып келмейтіндігін, тілті одан мұлде бейхабар жүргенінде төбенен жай түскендей қылатынын «Мылқау мезгілдің мұзды суын құюымен» шебер аңғартады. Яғни, ақын аз сөзге көп мағына дарытып, айтпақ ойын көркем тілмен жеткізеді.

Поэмалың соңғы тоғызыншы, оныншы бөлімдері Сара кыздың тек қана ішкі жан сыры, көңіл-күйі, әртүрлі сезім құбылыстарынан тұрады. Поэзиядағы ежелгі жыр үлгілерінің бірі – жыраулық дәстүр мақамымен төгілте жырлаған ақын өзге түгілі өзіне де сын көзбен қарайды. Өміріне емес, өзіне өкпе артады, өзгеге емес, өлеңіне сыр ашады.

Көңілге өкпелемеймін  
Шаттыққа бөлемедің деп.  
Өмірге өкпелемеймін  
Жүргенде ерен елім деп,  
Ескеріп елемедің деп.  
Найзағай жырларымменен  
Жылмың жұз, құңқіл кеуденің  
Көбесін сөкпедім-ау деп,  
Сөйтіп бір өтпедім-ау деп  
өзіме өкпелеймін [7, 17 б.].

Бұл айтылғандардың бәрінің жалғыз Сараның ғана базына-  
назы емес, белгілі бір дәрежеде ақынның өз жүргегінің сырты  
екендігін аңғару киын емес. «Ақын кейде актер сияқты басқа  
біреудің рөлін ойнай алады. Ақын өзінің жеке қасиеттерін  
және өмірге деген көзқарасын басқа біреулерге беріп, керісін-  
ше болуы да мүмкін» [17, 10 б.]. Байқағанымыздай, өзіне-өзі  
қатаң талап қойып, әділ сыншы болған лирикалық кейіп-  
кер жырларына тоқмейілсіп, тоқырап қалмайды. Керісін-  
ше, «жабыққанды жұбатар шуақты жырларым аз-ау», –  
деп өзіне өкпе артып, өкініш білдіреді. Бұл әрине, нағыз  
шығармашылық адамына тән міnez. Ақынның замандасты  
Қ. Сұлтанов айтпақшы: «Фаризаның творчестволық міnezі  
бүгіннен пайда бола салған құбылыс емес. Оның тамыры тым  
теренде, ғасырлар койнауындағы сарқылмас халық қорынан  
нәр алатыны анық. Халықтық дәстүрді, ұлттық тілді, ата  
ұрпакты ерекше сыйласп, қадірлей білуде көп ақындар ішін-  
де Фаризадай дара ақынның ғана суреткерлігіне, синтездік  
оішылдығына тән қасиет» [18, 5 б.].

Қазақтың ақын қызы, «Жетісудың бұлбұлы» – Сарага  
арнаған Фариза поэмасы тағдыры өнермен егіз қазақ қыз-  
дарының ғана өмір жолын арқау еткен жок, жалпы «тайғақ  
тағдырлы» қыз тағдырына арналды. Поэма сонысымен  
күнды.

Поэманың қандай бір ұлттық поэзияның жалпы дәрежесін  
көрсететін өрелі жанрдың бірі екендігі белгілі. Көрнекті орыс  
акыны В. Боковтың: «По своим идеально-художественным воз-  
можностям отражения жизни и монументальности она играет  
ту же роль, что симфония в музыке», – деп поэмага ерекше мән  
беруі де соның айғагы [19, 58 б.]. Өмір шындығын суреттеуде,  
кейіпкер болмысын танытуда қазақ поэмасы жаңаша ізденіс-  
термен айтарлықтай жетістіктерге қол жеткізіп келеді. Поэма  
табигаты өлеңнен өзгерек. Өлеңге бір ғана сезім жеткілікті  
болса, поэмага қызмет ететін көбіне-көп тарихи оқиғалар,  
жеке тұлға іс-әрекеті, тағы басқалар. Қазақ поэмасы өзінің

жылдар бойғы даму тарихында көптеген өзгерістерді бастаң өткөргөн жанрдың бірі болғанымен, ол халықтың, ұлттың тағдыры мен шығармашылық түлғаға деген қызығушылығын сақтап қалды.

Ф. Онғарсынованың «Тартады бозбаланы магнитім» поэмасы қазақтың тұңғыш әнші қыздарының бірі, әрі кәсіби әншілік деңгейіне дейін көтерілген майталманы – Майра Уәлиқызына арналады. Ақын Майраның өмір жолымен қоса әншілік тағдырын айқын көрсету арқылы сол заманың әлеуметтік тынысын да танытады. Поэманың бас кейіпкері – әнші Майра Уәлиқызының қазақ өнерін зерттеген музыкатаңушы-ғалым А.В. Затаевич «Қазақтың әнші әйелдерінің ішіндегі ең үздігі» деп бағалаған. Майраның ән айтудағы ешкімге ұқсамайтын әдемі дауысы туралы да тұңғыш қалам тартқан музыка зерттеушісі А.В. Затаевич болды. Ол өзінің «Қазақтың 500 ән, күй» (1931) дейтін музыкалық–этнографиялық еңбегінде Майраның шығармашылық портретін дәлме-дәл кескіндеп жазады. М. Уәлиқызының өмірі мен өнер жолын жан-жакты карастырған З. Дүкенбаева Майра өнеріндегі жаңашылдықты тұжырымдай келе: «Біріншіден, Майра қазақ әнінің мазмұнына, түріне бірталай жаңалық енгізді, екіншіден, елге таңсық гармонды пайдаланды, үшіншіден, өнерге европалық өзгерістер әкелді, төртіншіден, ол қазақ әндерімен қоса татар, орыс әндерін көп салды [20, 66 б.], – деп әншінің өзіндік ерекшеліктерін саралап көрсетеді.

Майраның артындағы шығармашылық мұралары жөнінде З. Қоспақов мынадай мәлімет ұсынады: «Музыкадан аса қабілетті Майра ән айта жүріп, өз жанынан да ән шығарады. Сондай әндердің қатарында «Майра», «Ертіс», «Қызыл гүл», «Бакша», «Даланың әні», т.б. сияқты туындылары бар. Бұл шығармалар шағын болғанымен, біртуар шығармалар. Майраның әндерін кезінде Қазакстан композиторлары Е. Г. Брусиловский «Қызы Жібек», «Жалбыр» операларында, А. Зильбер «Қайта туған Қазақстан», симфониясында,

А. Байқадамов «Майра» деп аталатын туындыларында пайдаланды» [21, 48 б.].

Қазақтың әнші қызы Майрага арналған өлең-жырлар жетерлік. Ал үлкен жанр – поэмаларға келер болсақ, Майрага арналған Ә. Тәжібаевтің «Майра» атты поэмасы 1976 жылы «Жұлдыз» журналының 3–4 санында жарияланып, кейіннен бес томдық шығармалар жинағының 2-томына енген. Ә. Тәжібаевтің «Майра» поэмасындағы Майра образы Ереймен (Майраның алғаш сүйген жігіті), Қажы ата (Ерейменнің әкесі), Қажымұқан (атақты палуан), Саттар (Майрадан дәмелі өз ауылының айтыскері), т.б. кейіпкерлермен байланыстыра суреттеліп, сол негізде ашылады. Майра бейнесін акын сол кездегі өзекті тақырыптардың бірі – әлеуметтік теңсіздік арқылы ашуға тырысқан. Бірін-бірі ұнатқан екі жас – Майра мен Ерейменнің қосылуына «сол елдегі жарты патша» – жігіт әкесі Қажы ата қарсы болады. «Жалаңаш етікшінің сайкал қызын, Сен түгіл мен алмаймын тоқалдыққа», – деген әкениң қатал үкімінен соң Ереймен кеселді бол 40 күн тесек тартып жатып, көз жұмады. Бұл – яғни, махаббаттан Мәжнүнге айналу сипаты шығыстық қисса – дастандарды еске салатын элемент. Сондай-ақ, мұндағы Майраның іс-әрекеттерінен оның махаббатқа деген адалдығы, т.б. қасиеттері байқалмайды. Ереймен өлген соң, Майраның көңілі атақты палуан Қажымұқанға ауады. Алайда, оның Лондонға кетуімен аралары алыстайды. Осылайша жалғыз қалған Майра поэма сонында ақырғы рет бір ән салып дүниеден өтеді. Негізінен баяндау тәсілінде келетін поэмалың әлқисссасында акын Ә. Тәжібаев:

Бойы тік, солқылдаған белі талдай,  
кен маңдай ақ күміспен қаптағандай.  
Екі ерні үлбіреген қызыл шешек,  
Жалт еткен жанарынан нұр тамғандай.  
Жүргені қандай әсем әм күлгені,  
Секілді жаздың лебі алған демі.

Қараса мейірімімен шын қарайды,  
Құлакқа күй құятын үні әдемі [22, 89 б.]. –  
деп Майраны эпостық үлгідегі асқан сұлу жан ретінде су-  
реттейді.

Ал Ф. Онғарсынованың поэмасында Майраның сырт  
пішіні, кескін-келбеті бейнеленбейді. Ақын поэмасындағы  
Майраның әншілігінен ғөрі ожет, өр мінезімен, құресскерлік  
қасиеттері басымырақ суреттеледі. Алайда екі ақынға да тән  
ортак сипат – Майраның сезім–толқыныстарын өз аузымен  
яғни, монолог тәсілі арқылы айтқызу.

Әнші Майра тақырыбы поэзиямен қоса проза жанрына да  
арқау болды. Бұл жөнінде ғалым Ә. Нарымбетовтың мына  
бір пікіріне құлак түрелік: «Бір тақырыпқа бірнеше ақын-  
жазушылардың қатар, жарыса қалам тартуы әр әдебиетте  
де бар үрдіс. Атакты Майра туралы бұған дейін де белгілі  
шығармалар жарық көрген еді. Ал, Ф. Мұсіреповтің 1981  
жылы жазылған «Атакты әнші Майра» әңгімесінде өнер  
жүлдзызы Майраның көрікті портреті, ішкі өмірінің жарығы  
сөз құдіретімен окушы зердесіне нұр болып құйылады.  
Майраның махаббаты, ұнату, сую, жеккөру сезімдері,  
мінезінің, көніл-күйінің әр алудан ірімдері шым-шымдан  
берілген деталь, штрих, эпизод көріністері арқылы әр түсті  
көркем бояумен әдемі өрнектелген [23, 54 б.].

Ф. Онғарсынованың «Тартады бозбаланы магнитім» поэ-  
масы өнер адамының тағдырын арқау еткендіктен, мұндағы  
негізгі оқиға желісі әнші Майраның айналасында өрбиді.  
Ф. Онғарсынова әнші өмір сүрген дәуір келбетін, орта шын-  
дығын, әйел теңсіздігі жайланақ қазақ қоғамының көріністерін  
Майра арқылы ашуға тырысады.

Шырқайын – сазды сарнай досым қайды?!  
әндесем, қыз-бозбала қосылмай ма?!  
Думанның бозбаласыз қызығы жок  
өртейін, өртенейін осындайда!